

73  
MEMORIAE  
VIRI ET THEOLOGI SVMMI  
GEORGII CA-  
LIXTI,  
ORATIO

CHRISTOPHORI SCHRADERI,  
*HABITA IM ACADEMIA IVLIA*

XXIV. SEPT.



*CIC MDCLVI.*



*HELMESTADI,*  
IN TYPOGRAPHEO CALIXTINO  
Excudit  
HENNINGVS MÜLLERVS

*ANNO CIC MDCLIX,*

Misc. Vol. 638

CHANDLER  
AT THE  
CITY OF



*Magnifico, Perquam Reverendo & Clarissimo*

*V I R O*

DN. FRIDERICO VLRICO  
CALIXTO

S. THEOLOGIE D. ET PROFESSORI  
ORDIN. ACADEMIE IVLIE HO.  
DIE PRORECTORI,

Domino Collegæ, Compatri & Amico  
pl. colendo

CHRISTOPHORVS SCHRADER

S. D.



Quum Serenissimorum  
Celsissimorumq; Du-  
cum Brunsvicensium  
& Luneburgensium,  
Dominorum nostrorum clemen-

A z

tissi

tissimorum Legati , anno superiori, vilendæ ordinandæque Aca-  
demiæ, denuo ad Nos venissent,  
& iis quæ boni publici causâ sus-  
cepta erant negotiis feliciter per-  
actis, ego solennem conventum  
oratione in Iuléo finire juberer,  
censebam non amittendam esse  
occasionem, celebrandi memo-  
riam venerandi Parentis Tui, Vi-  
ri de Academiâ & Ecclesiâ uni-  
versâ, &, si id addi fas est, de me  
quoque optimè meriti. Quan-  
quam enim non multo post illius  
beatum obitum, vitæ ejus seriem  
undiquaque collectam studiosè  
perscripseram, & rogatus Aca-  
demiæ

demia tradideram, tamen pietati  
 nondum videbar fecisse satis,  
 ni ex eodem loco unde ille & do-  
 cuit præclarè & Præceptores suos  
 hac mortalitate defunctos diser-  
 to ore me audiente toties lauda-  
 vit, virtutem ac doctrinam ejus-  
 dem si minus disertè, attamen can-  
 didè & verè de prædicarem. A-  
 gnosco enim lubens, &, quoad vi-  
 xero fatebor, Parentis Tui perpe-  
 tuam benevolentiam & gratam  
 consuetudinem inter præcipua  
 vitæ meæ bona mihi adhuc fuisse.  
 Anni sunt hoc ipso mense sex & tri-  
 ginta cum domum illius primum  
 sum ingressus, frequenti ac con-

stanti auditione , optimâ Pro-  
fessorem conciliandi ratione , il-  
li magis magisque innotescens ,  
& tandem ita carus , ut non  
studia tantum mea fideliter or-  
dinaret , sed & studiorum sub-  
sidia , & tandem quoque studi-  
orum fructus omni suâ ope fe-  
liciter mihi compararet , Præce-  
ptoris , Patroni , Parentis erga  
me functus officio. Ego vero  
& beneficia mihi exhibita , & cum-  
primis summam illam Viri pieta-  
tem atque omnigenam sine exem-  
plo doctrinam , cum singulari jun-  
ctam comitate ac morum sua-  
vitate , quam mecum tot boni  
& o-

7  
y  
& omnes qui cum illo verſati  
ſunt agnovère , grata ſemper  
ac perpetuâ colam memoriâ ,  
ad ſuave ejus conſortium in be-  
atâ immortalitate , cum vitæ  
arbiter juſſerit , redire , exo-  
ptans. Tibi verò , Magnifice  
Domine ProRector , cui ob  
multifaria beati Parentis benefa-  
cta tam arctè ſum obſtrictus ,  
memori mente reddam vicem ,  
quâ potero , in cujus fidem do-  
no & dico tibi iſtam orationem ,  
quam quidem æternis tenebris  
ſtatueram damnare , & damnaſ-  
ſem , ni ſummorum virorum au-  
ctoritate , & tuâ quoque perpetuâ

tuâ appellatione fuiffem revo-  
catus. Animadvertēbam equi-  
dem , pagellas iſtas relegens mul-  
ta cum doctri-næ tum virtutis  
Calixtinæ juſta elogia mihi præ-  
terita , pleraque verò etiam te-  
nuius commemorata ; at ſubiit a-  
nimum ipſius beatiſſimi Patris  
tui Vox , ſæpe , quod memini-  
ſti, uſurpata, qua demirari ſe a-  
jebat , quod adeo præpoſterè ſe-  
cum ageretur , & à nonnullis  
quidem tam effuſè, ac tantum  
non in cœlum laudibus tolle-  
retur , ab aliis penè ad tartara  
immanibus proſterneretur convi-  
cijs.



ciis. Malebat nimirum modera-  
ti Vir ingenii & laudari citra am-  
bitum , & si qua fortè erraret ;  
modestè ac sine scommate ad-  
moneri. Ego itaque dum aureæ  
illius , & à B. Parente tantopere  
cultæ mediocritatis memor , ma-  
ximum Virum intra modum lau-  
davi , à Te , mi Collega , facile ,  
ut spero , veniam impetrabo ;  
quam si & ceteri Calixtinæ pie-  
tatis atque eruditionis conscii le-  
ctores mihi dabunt , summam  
voti ero consecutus. Deum  
precor ut Academiam Iulianam , à  
morborum nupero contagio ,  
indultu cœlesti , feliciter respi-

B

ran-

rantem; ac sibi reddi cœptam; confirmet benignus, quò ad lares nostros jam nunc redire parantibus, illud Ecclesiæ & Reipublicæ seminarium suo cuique loco gnaviter, ut per est, colere, & Tibi in primis patrii nominis gloriam patriis virtutibus feliciter propagare divino munere concedatur. Scripsi in Cœnobio Bergenfi Idib. Decembr. Anno CIO IOC LVII.

*Serenif.*

*SEnatusimorum & Celsissimorum Principum ac Dominorum;  
Domini AVGVSTI, Domini CHRISTIANI LVDOVICI,  
Domini GEORGII VVILHELMII Ducum Brunsvicen-  
sium & Luneburgensium, Principum & Dominorum nostrorum  
Clementissimorum, Illustrres Legati, Viri Nobilissimi, Magni-  
fici, Excellentissimique, Patroni honoratissimi, Magnifice Do-  
mine Vice-Rector, Inchyrorum Ordinum Ducatus VVolfenbvtani  
delecti Procures, Clarissimi & Celeberrimi Academia Iulie  
Professores, Collega carissimi, Reverendi Domini Pastores, &  
Tu Nobilissima atque in spem Patria efflorescens Civium nostro-  
rum Concio.*

**N**I pietas & obsequium, magni viri manibus pridem  
debitum lectum a me ex hoc loco tandem nunc re-  
quirent, ego hoc tam illustri ac felici die dicere  
iussus, argumentum eligerem ab eorum instituto, qui vi-  
ce non una hac astate isthic perorarunt planè diversum.  
Enimverò quotquot in hoc Musarum templo nuper ver-  
bafecerunt, fecerunt autem intra hoc semestre omnium  
quatuor Ordinum Professores, dum multiplicia Acade-  
miæ Julæ vulnera, & ipsorum octo Collegarum intra  
septem annorum spacium flebiles excessus retractarunt,  
in luctum & gemitus vocare Cives sibi proposuerunt.  
Quæ quidem ratio aliena videri poterat ab hoc tempore,  
quo Serenissimæ Domus Principalis auspicijs & summo-  
rum virorum ductu illustris hujus Lyceires iterum sunt  
firmatæ, & conservationi propagationique studiorum de  
novo ritè est consultum. Ceterum quæ hoc præsertum  
anno Academiam affligerunt, in animum penetrarunt al-  
tius, cumque affecerunt tenerius, quam ut linguam co-  
hibere possint. Nam, ut superiora omittam, amiserunt

hant ita pridem insignia quædam ornamenta sua, trix  
Collegia, Philosophicum quidem JOHANNEM  
HOMBORG IUM, divinarum humanarumque re-  
rum scientissimum Doctorem, Iuridicum JOHANNEM  
MEHLBOMIUM, non minus Iuris utriusque, quam  
omnis honestatis & Christianæ pietatis consultum, Theo-  
logicum autem magnū illum CALIXTUM, cujus  
fatum cum Academia gravissimè meritò lugeat, ego &  
meo sensu & Patroni suggestu admonitus, non alienum ab  
hac panegyri fore existimavi, præcellentis hujus viri me-  
moriæ hanc solennem horam simul consecrare, ut Sere-  
nissimorum Ducum Brunsvicensium & Luneburgensium,  
clementissimorum Dominorum nostrorum, dum sacrum  
hoc publico bono devotum Collegium Professorium non  
tantum conservant ac tuentur, sed & statis temporibus  
visunt ordinantque, in patriam, in rep. litterariam, in  
ecclesiam excelsum beneficium vel ex unius Collegæ  
nostri præclaris dotibus meritisque existimari possit.  
Quandoquidem autem vitæ illius à natali ad emortua-  
lem usque decursus jam alibi haut perfunctorie est de-  
scriptus, nunc quidem serie isthac omissa ad Viri erudi-  
tionem atque probitatem, summam utramque, animum  
seorsum advertemus, satis, ut equidem existimo, elogij  
dicturi, si duabus istis dotibus sideris instar effulsisse  
ostenderimus. Neque enim cuiquam nostri ordinis  
majora ulla queunt esse ornamenta. Vos, Auditores,  
qui ad celeberrimi & omnibus vobis singulariter culti viri  
nomen à me inexpectatò hic, ut reor, appellatum, ora-  
vestra spectatius convertistis, date quæso hoc gratæ il-  
lius memoriæ & attentas aures ad finem ulque æquis  
animis præbere perseverate.

Atque ut de eo quod omnis & virtutis & erudi-  
tionis

tionis fundamentum est, quodque Aristotelis, de necessariis, doctrinæ auxiliis interrogati, notissimo apophthegmate primo loco statuitur, primo loco agam, indolem singulari quadam naturæ benignitate nactus erat CALIXTUS longe felicissimam, ingenium nempe acutum, capax, fœcundum; judicium sincerum, grave, firmum, & per ea quæ audiret legeretve, solerter penetrans; Memoriam rerum custodem acrem ac fidelem. Ad studium verò discendi & assidui laboris tolerantiam adeo factus erat à natura, ut cum Theopompi instar freno reprimi indigeret, nullius tamen cohibitione ab antelucanis vigilijs, & à perpetua ac pertinaci lectione scriptio- neque, ne senex quidem, posset avocari. Erat eidem altè insitus ardor perquirendæ & acutè amplectendæ veritatis, quam cum eorum quæ hominì concessa sunt, omnium pulcherrimum, omnium divinissimum esse maturimè imbibisset, ita erga eam naturali indole sua affectus erat, quomodo divinus Plato perfectionis suæ cupidum hominem, in eam ferri postulavit, instar nempe venatoris, qui omnibus vestigijs ferarum latibula indagat. Cujusmodi erga veritatem fervidum amorem cum rerum natura, alma illa parens CALIXTO insevisset, simul quoque alteram dotem sine qua ista non constat eidem tribuit, quam Græci *φιλαλογεῖναι* appellant, nos studium accurationis dicere possumus. Ad hanc pariter à solerti natura ille fectus, nihil sectari protritum, nullam momenti alicujus doctrinam à limine salutasse aut veluti inter strepitus exaudisse erat contentus, sed caligine, quæ ferè tegere verum solet, discussa, ad intima rerum penetrabilia, propitià Minervâ aspirabat. His præclaris ingenij dotibus, parem quoque animum rerum conditor illi ingenuerat. Erat enim pectus illi maximè generosum,

nihil spirans abjectum, nihil fractum, nihil vile, lenissimum  
interca, & in mitiora omnia nunquam non prouum. At-  
que hanc à liberali rerum creatrice inditam præclarum  
mentem, ipse quoque vultus præferebat, venustus, libe-  
ralis, placidus, gravis, oculos volvens intentos. Talem  
ergo qualem diximus indolem ad discendum, cum attu-  
lerit, & præter eruditum parentem, optimos cum in clas-  
sica tum in regia Schola præceptores fuerit indeptus,  
minus mirum est magnis cum passibus statim processisse,  
& in lingua utraque in poesi Græca & Latina, in historia  
sacra & externa, in orationibus scribendis, in artium libe-  
ralium circulo, in philosophia, in diuinarum litterarum  
studijs, in omni eruditione, grande adeo decus sibi com-  
parasse. Etenim si ambo ista amicè concurrant, solers  
ingenium discantis & peritia ac dexteritas doctoris, &  
ille quidem proficere, hic prodesse & possit & omni ani-  
mo velit, tum videlicet demum operæ sit premium &  
longe ultra vulgarem gradum doctrina provehitur. Et  
vero ingenio isto suo excellenti, & dexterrimis Præcepto-  
ribus, ita usus est CALIXTUS ut cum in verborum,  
tum in rerum studijs summa omnia fuerit consequutus.  
Romanæ linguæ, communis illius per universum erudi-  
tum orbem Mercurij, quanta cura, quantus nitor, quam  
inaffectatus in omnibus ejus scriptis compareret or-  
natus! Verba propria, selecta, non nisi parè ac vere-  
cundè translata; collocatio facilis, apta, nec tam leporis  
quam ponderis causa ad rationem & artem directâ. A-  
quo genuinæ Latinitatis perpetuo & constanti cultu  
avertere cum haut potuit multa quamvis lætio Scho-  
lasticorum, quos vocamus, Doctorum, in quibus cum  
adultiore ætate aliquando totus esset, & ad tempus ve-  
luti habitaret, rerum momenta ingenium perficiebant,  
sordes

sordes dictionis linguam aut calamum inficere nulla puterant. Nempe quæ è puræ Latinitatis autorum limpidis fontibus primis annis cupidè hauserat, altè adeo in animum erant admissa, ut ne adultis quidem turbarentur, nec cum dicere aut scribere ingrederetur, vel Plautum Robertus Holkot, vel Terentium Wilhelmus Occam, vel Ciceronem Nicolaus de Gorram florido illo Latinitatis Calixtinæ campo pellere valeret. Neque vero puri sermonis Latini cultor ipse tantum erat sed & censor, atque ab alijs in seram usque ætatem exactor. Nequaquam enim fas esse censebat tanta luce litterarum undique diffusa, ceteras doctrinarum partes elegandi & splendida oratione à cultoribus tractari, sublime illud cœlestis veritatis argumentum genere sermonis vili quin sæpe inquinato à quoquam affligi. Cum Latinis litteris Græcæ à prima statim ætate conjunxit & in ultimam usque constanter coluit. Supersunt Græca carmina, quæ adolescens panxit, & scripta quæ vir & senex publicavit, quam fuerit Poëtarum, Historicorum, Patrum, etiam Græcorum lectioni innutritus liquidò demonstrant. Et quî tam diu Cl. CASELIO familiaris esse potuisset, in litteraturæ Græcorum amorem cultumque aut attulisset aut accepisset ab eo, qui ad has sapientiæ & eloquentiæ scaturigines omnes suos sectatores, etiam juris scientiæ studiosos, quin & Nobilium virorum liberos tam diligenter deducebat. Divinorum sanè voluminum interpretatio Calixtina solida adeo atque felix esse nunquam potuisset, nisi in Apostolicorum fonte, & Prophetarum primis rivis, Græcis utrisque, peritè versari didicisset. Jam in Mosis & ceterorum divinæ mentis interpretum libris authenticis, quam non sueverit fidere oculis alienis, sed suis uti valuerit, & prælectiones quas  
ad au-



ad auditorium suum per ipsos quadraginta annos habuit, & scripta quæ cum erudito orbe universo interim communicavit, abundè loquuntur. Ipsam nimirum quam merito vocamus, veritatem Hebraicam adire, legere, intelligere, & genuino ejus sensui eruendo Masoræ, Chaldaicarum Paraphrasium, Rabbinicorum commentariorum subsidia advocare, iisdemque tempestive uti, Præclare utique, & rectius, quam multi, qui nunquam non ista crepant, novera CALIXTUS. Unde cum in celebri illo cum Pontificio Doctore Hemelschenburgi instituto congressu, Vulgatam S. Scripturæ versionem alicubi erroris argueret Noster, & iste in B. LUTHERI versionem telum retorquere niteretur, adeo in nulla divinarum scripturarum versione bonæ causæ præsidium sibi esse testabatur CALIXTUS, ut Hebræum codicem in medium atterri, & ex illo indubitato principio omnibus versionibus semotis disputationem institui confiderenter postularet, ac in se susciperet. Ad quod iste, *Ego, ajebat, tantum Hebræum me non profiteor*, hic enim adversarij herbam porrigentis tum erat diasyrmus. Neque verò mirum est, etiam harum litterarum scientiam minimè vulgarem sibi parasse CALIXTUM, quippe qui & suoapte judicio ad omnia studij Theologici auxilia docilem animum converterat, & CORNELII MARTINI, sanctæ linguæ periti cultoris, quotidiano exemplo, VALENTINI autem SCHINDLERI linguarum Hebraicæ, Syrac, Chaldaicæ, Arabicæ in hac Academia tum Professoris longe celeberrimi, viva voce ad has Orientis Musas fideliter fuit manu ductus. Omittam hic delinguis vulgaribus, quas præter maternam non unas ille callebat commemorare, quod tres istæ quævis insigniter instructus erat divinæ humanæque sapientie



entia discenda docendaque sufficienti. Progrediar itaque ad Poësin, quæ prima ejus fuit philosophia, in seros usque annos culta atque frequentata, nec tantum inter exercitia adolescentiæ, aut oblectamenta senectutis ipsi habita, sed cum primis veræ virtutis & variæ doctrinæ cum voluptate primùm imbibendæ, post cum quadam illecebra etiam alios docendæ instrumentum. Hunc enim genuinum Poëseos finem esse norunt eruditi. Atque in hunc scopum intentus, in omni genere poematum adeo diligenter est versatus, ut cum occasio invitaret è Comicis, Tragicis, Epicis, Lyricis, integras pericopas promptè recitare, & quod potius est, ad illorum ductum elegans, concinnum, grave carmen, non sine coelestiali quoque mentis instinctu, pangere valeret, ad has amoenitates non ingenio tantum promptus, sed & animo tam facilis & benignus, ut nonnunquam & amicis, si quorum fortè arentior erat vena, succurreret, & suis nomen alienum adscribi indulgeret. Delectabatur autem inprimis Epico genere, quod hujus majestas generosæ ejus menti, & sententiarum, quas illa edebat, gravitati conveniret. Quale, inter sexcenta alia, est, quod ante hos quadraginta annos, cum splendida hæc Musarum ædes inauguraretur ad FRIDERICUM ULRICUM, excelsæ memoriæ Principem, de divo JULIO Academiæ conditore perscripsit. Lubet divini hujus carminis paucos versus qui vel soli orationi meæ fidem faciant hic recitare.

*Magnanimus Princeps, cui dum mortalibus illo  
Gaudere & coram vultus atque ora tuere  
Fas erat, Hercynias latè gens sparsa per oras  
Parebat, vastoque cacumine Bractærus ingens*

C

Nunc

*Nunc potius regnam, & aliq̃ beata recepit*

*Aula*

Et quæ longo ordine, pari spiritu ibi porro attexuntur. Quibus istiuslibris verbis & jucundis numeris & illi respondent, quos in Bibliothecam Juliam novennio post eadẽ felicitate fudit. In Thesaurum inquam, quem ætimum istud Julci tabularium recondit,

*Armentaria sacra*

*Pallados, & castis habitata paluria Musis.*

*Quicquid ab ingenio post tristia fata regumque*

*Et cineres summis non est superesse negatum*

*Mortali de stirpe viris, hoc limine claudi*

*Conjectus, oculorum uno te cernere nōris.*

*Hic vitam vivunt, & post sua fata loquuntur*

*Seculorumq̃, minas superant & edacia rerum*

*Tempora qui terris caput altius exseruerunt*

*Naturaq̃, super fines, super aethera celsum*

*Evexere animum*

Equa particula vobis, *Auditores*, de integri carminis venustate judicare est in proclivi. Mihi sane dignum videretur, ut quemadmodum Oppiani Poëtæ versus singuli aureo statere à M. Antonio Imperatore sunt donati, ita hujus Calixtini poëmat̃is singuli saltem argenteis totidem ab Academiæ Bibliotheca remunerarentur. A Poësi ad Historiam progrediamur, quæ cum scriptoribus omnibus, & cuivis parti melioris doctrinæ magnum lumen sceneretur, ab hoc eruditionis universæ primum candidato, postmodum consulto enixiore operafuit pervestigata, & adeo quidem accuratè, ut in naturali ad ipsam propemodum Medicorum peritiam accederet, in civili Politicos & exquisitissimos Jurisconsultos æqua-

ret,

set, in sacra & ecclesiastica, omnes nostri avi Theologos longo post se intervallo relinqueret. Sed & mythicæ illius, quæ gestorum quædam vestigia multorum figmentorum veluti frondibus occultat, quam minimè ignarus fuerit passim insertæ carminibus corollæ satis superque indicant. Quæ autem hac potior est vera rerum memoria, siue illa præcipuarum gentium, à primò hujus universi ortu ad nostram usque ætatem continuam seriem, siue seorsum Judæorum, Romanorum, Græcorum, Germanorum respublicas, leges, ritus, clarorum item virorum facta ac dicta memorabilia, complecteretur, adeo illa omnibus vestigiis per Auctorum monumenta impigro labore illi erant indagata, animadversa, digesta, ut cum ordo studiorum id exigeret, de omnibus illis cum commentarij tum disserere valeret. Nec proletariè, sed solidè prorsus atque eruditè, quippe qui genuinos scriptores ipsos impigrè evolverat, & in his non ad eventuum tantum varias vicissitudines, sed ad causas ipsas, ad prætextus, ad agendi modos, solertem animum attenderat. In quibus omnibus ne velut in illuni nocte passim offenderet non tantum locorum per universum terrarum globum, & temporum ab omni ævo sibi paraverat scientiam, vastam, excellentem, perfectam, sed & familiarum ac personarum illustrium, ortus, propagines, incrementa occasus & observaverat studiosè & ubi opus, siue calamo, siue diserto ore promere poterat, non prisecam tantum, sed & mediam, & recentem ætatem, vasto suo ingenio complexus. Quæ quidem verisimè de illo prædicari è monumentis ejus ingenui lectores, è quadraginta amplius annorum perpetuis scholis, attenti auditores, è fortuitis sermonibus familiares nec

ignorant, & quotquot candidi sunt fatebuntur. Ego  
sanè etiamnum cum veneratione præstabilis doctrinæ ejus  
recordor insignium dissertationum quas ante hos  
xxx annos, tum divinorum Prophetarum, Esaiæ, Jere-  
miæ, & Ezechielis libros vivâ voce interpretaretur, de  
Babyloniõrum, Assyriorum, Ægyptiorum, Arabum,  
Phoenicum, Tyriorum, Æthiopum, aliarumque cœlesti  
vatum ore memoratarum & partim flagellatarum gen-  
tium rebus è priscis scriptoribus variè habuit, cum ut  
lucem oraculis istis undecunque accenderet, tum ut anti-  
quitatis memoriam non è stagnantibus lacunis, sed ex  
amœnis fontibus esse hauriendam, & quod in Græcis La-  
tinisque interdum fluit lutulentum, è limpidâ Israelis  
scatebrâ diluendum esse juventutem admoneret. Sed  
& recentioris ævi gestorum monumenta, quam fuerint  
ipsi pervolutata, & interibi dum ista patrantur conquiri  
solita, omnes quæ erudita ejus consuetudine frui con-  
tingit, sciunt & commemorerunt. Nec sanè de ullâ nostræ  
ætatis aut gente, aut regno, aut illustriori familiâ sermo  
incidebat, cujus ille non decora, errores, fatâ cum curâ  
animadvertisset, & ex vero docere posset, ea in his mixtâ  
cum gravitate utens modestiâ, ut nec de quibus non  
certò sibi & accuratè constaret, verba faceret, & multo-  
rum quæ de recentioris ævi rebus permoverat commem-  
orandorum occasionem sæpe transmitteret, nunquam  
certè aucuparetur. At in sacra illa cum veteris Syna-  
gogæ, tum Christianæ ecclesiæ, à primis incunabulis ad  
hanc usque senescentem & penè decrepitam ætatem hi-  
storia, quam ex omni parte versatus fuerit CALIX-  
TUS è scriptis ejus exploratus est, quam ut pluribus  
egeat confirmari. In hac sanè vel maximè eum præcel-  
lere,

fere, ipsos quoque hostes ejus, illa omnium domitrix  
veritas cœgit agnoscere. Hanc ergo laudis Calixtinæ  
partem insigniter conspicuam, velut tabulam omnium  
applausu in memoriz tempo altè dudum fixam, cum  
veneratione aspectasse contenti, agite *Auditores* jam por-  
rò quam & Orator gravis ac disertus ille fuerit, mecum  
recognoscite. Enimvero si, quod verè M. Tullius dixit,  
eloquentia nihil est aliud quam copiosè loquens sapien-  
tia, si quod Tullij Magister docuit, posse id quod vim  
persuadendi habet, promptè animadvertere, orandi sci-  
entia est, quam & hio eruditi ordinis gradus venerabili  
Collegæ nostro apprimè conveniat, quivis intelligens  
existimator facile agnoscer. Quàm enim ille de varijs  
& de sacris maxime rebus, sapienter, copiosè, & ornatè  
dixit! Quàm & in suis scriptis adornandis, & in re-  
textendis alienis ea quibus vis confirmandi inest solèrter  
advertit, ijs quæ hoc nucleo cassa sunt abjectis. Ordo  
autem, qui judicij dicentis index, ingenij audientis Lux  
esse solet, quam accommodatus ubique, & si pauca for-  
tè quæ senio jam fatiscens, & animo distractior scripsit  
excipias, lucidus, passim, ac concinnus. Verborum de-  
lectum, quæm originem eloquentiæ magnus Imperator  
dixit, eorumdemque nitorem jam supra in eo commen-  
davimus. Atque hac scienter, peritè ornatèque dicendi  
facultate, quæ præcellebat, & scribendo, & variè erudite-  
que ex hoc ipso loco orando usus est præclarè, & primis  
quidem Professionis suæ annis adeò frequenter, ut men-  
sem fere nunquam prætermitteret, quo non vel de sacro  
dogmate religionis, vel de arduo quodam loco divi-  
narum scripturarum, vel de veteris ecclesiæ quodam motu  
extra prælectionum ordinem & sacris fere diebus habe-

ret lulentam, gravem, expolitam & Gregorij Nazian-  
zeni, Basilij M. aliorumque sanctissimorum Oratorum  
concionibus comparandam orationem. Cum verò aut  
magnorum Principum aliorumve qui reip. clavum te-  
nent animis salutare sententiæ seorsum inferendæ, aut  
noxia erant evellendæ, cum ecclesiæ Antistitum animi li-  
teris aut sermone docendi, tractandi, flectendi erant,  
cum in senatu nostro, de salute Academiæ, de Professo-  
rum cum officio, tum stipendio, de moribus juventutis,  
de conservanda disciplina verba erant faciendæ, cum pri-  
vato alloquio ad veram virtutem, solidam doctrinam se-  
cundandam, ad fugiendos seculimores, ad charitatem Chri-  
stianam, ad divini numinis religiosam venerationem, ju-  
venum, senum, advenarum mentes, hortari opportuni-  
tas invitabat, quam erat oratio ejus gravis, benigna, dul-  
cis, flexanima, &, quo penetrantius in dicendo nihil est,  
Christi Domini miti ac leni spiritu plena. Quam qui-  
dem veram ac salutarem dicendi rationem, sive ut Magni  
Alexandri doctor loqui amat, λόγιον Φιλοσοφίας, in beato viro  
agnoscere, colere, admirari & dum hoc ævi degimus,  
pari cura exercere nostra cum mortalibus omnibus Chri-  
stiana necessitudo exposcit. Jam ab Oratore ad Philo-  
sophum CALIXTUM progrediamur, lubet enim in  
doctrinarum studijs Calixtinis commemorandis, eun-  
dem adhuc servare ordinem, quem in iisdem addiscen-  
dis excolendisque priscos, usurpasse ex Amphilo-  
chij Iconiensis ad Seleucum epistolâ, & erudito ejus interpre-  
te cognoscimus. Veteres enim à Poëtarum lætione ferè  
auspicabantur, ab his pergebant ad Historicos, ab histo-  
ricis ad oratores, inde demum ad augustam illam divi-  
narum humanarumque rerum scientiam Philosophiam,  
Tradi-



Tradidit & huic penitus cognoscenda eo se studiosus  
noster C A L I X T U S, quo ardentius & suo in-  
genio, & præstantium Doctorum monitu, & insigni  
ad coelestem doctrinam, afferendam usu præcepto illuc  
ferebatur. Etenim inter sapientiæ studiorum mille elo-  
gia, unum illud præsci Ecclesiæ Doctoris maxime place-  
bat & animo præcipue obversabatur, quo Philosophiam  
loricam & sepem esse dixit dominicæ vineæ. Cui ce-  
lende cum totum se consecrasset, non potuit non hoc  
tam necessarium illius præsidium, maturè, constanter  
& omni animi impetu sibi parare. Patavit autem sibi il-  
lud celeriter, cum ingenium capax, peritus doctor, copia  
librorum, & otium liberale abundè suppeterent. Quibus  
accedebat illa omnium efficacissima discendi ratio, op-  
portunitas nempe alios docendi, quæ tempore cumprimis,  
& quidem octodecim annorum adolescens felici-  
ter uti coepit, & per totam vitam uti perrexit. Inter  
Hebræos Doctores non nemo hoc de se verbum protulit.  
*Multa didici à Preceptoribus, plura ab æqualibus, omnium  
plurima à discipulis eorumque scrupulis & propositis dubitatio-  
nibus.* Pari ratione cum suum quoque acre & discendi  
pertinax ingenium à primis annis exercuerit C A L I X-  
TUS, triplici illo subsidio uno eodemque tempore diu  
simul fruitus, mirum non est in perfectum evasisse Philo-  
sophum. Præsertim cum veri investigandi, & à falso  
distinguendi certam illam normam, illam omnium co-  
ntroversiarum arbitram, Logicam non tantum à summo  
præceptore accuratè didicerit, sed & voce ac scriptis  
alios præclare docuerit. Quam & perpetua exercita-  
tione ita sibi reddiderat familiarem, ut cujusquemodi  
rerum involucri objecta hac veri falsique regula promptè  
& ce-

& celeriter evolveret. Mathematicas porro scientias  
& ipsas inter primas comprehendit, post alios summum  
virum DUNCANUM LIDDELIUM, in his  
nactus Magistrum, cujus erudita voce ad penetralia hu-  
jus scientiæ ejusdemque præstantes scriptores deductus  
precium operæ fecit haut exiguum. Conspiciuntur in  
instructissima Bibliotheca Calixtina præstantium Ma-  
thematicorum volumina, quibus passim elegans viri ma-  
nus sagacis ingenij vestigia impressit. Et memini exi-  
mium nostri temporis Mathematicum, ante annos haut  
adeò multos à CALIXTI colloquio ad me sortè visen-  
tem seriò affirmasse, se cum Mathematicarum rerum in  
hoc viro vix tirocinium conjectarit, scientiam ipsam  
eamque minime vulgarem deprehendisse. Erat nimi-  
rum CALIXTUS similis Epaminondæ, de quo Spin-  
tharus Tarentinus Plutarcho auctore dicere est solitus:  
*In neminem suæ ætatis hominem se incidisse, qui & plura nosset,  
& pauciora loqueretur.* Cujusmodi Epaminondæ inge-  
nium, audiendo quidem & discendo inexsaturabile, ce-  
terum taciturnum & cautè se dāns adloquendum, in hoc  
beato Collegæ nostro, quantum ad naturalem attinet  
Philosophiam pariter agnovimus, hujus enim nobilissi-  
mæ scientiæ humanâ curâ dignissimas partes cum omnes  
grāviter excoluisset, ipsæque perdiscendis ad Medicorum  
artem, quem scopum aliquandò respexit, se præclarè  
præparasset, quā & ipsdem docendis annum hujus seculi  
undecimum tribuisset, nunquam tamen quidquam ho-  
rum ambitiosè præ se tulit. Ubi verò aut ad sacrarum  
literarum intellectum, aut ad Christianæ fidei dogmatum  
explicationem, aut eorum quæ supra naturam divinitus  
sunt patrata demonstrationem Physicæ scientiæ sub-  
dium



15  
dium erat advocandum, explicabat se fecundum pectus,  
& quod cœlestis doctrinæ intellectum genuinum veritatemque illustraret, ex hujus quoque Philosophiæ adytis eruditè ac disertè depromebat. Porro quæ naturalis legis sunt, & ad virtutum, cum intellectualium tum moralium indolem atque munia declaranda pertinent, quo cum sancta disciplina cohærent arctius, eo sunt ab illo exculpta perfectius. Cujus cum in scriptis ejus dictisq; longè plurima ostendi vestigia possint, vel ea quæ adolescens de summo bono, de virtute, de justitia, & jam grandævus de morali Theologia universa perscripsit publicavitq; justum perhibere possunt testimonium. Neque vero cum de populi Israëlitiçi, de Christianæ Ecclesiæ regimine, de regum ac Principum Christianorum officiis, & res suas tuendi optimis rationibus, de Tyrannide Orientalium, de civitatum cum ecclesiastico tum civili magistratu dicendum scribendumve erat, eorum quæ è civilis scientiæ penetralibus petenda sunt quidquam eum fugiebat. Quanquam vero in hac Calixtinæ Philosophiæ recensione ea brevitate, quæ multa transeat mihi est utendum, non est tamen prætermittenda commemoratio dominæ scientiarum Metaphysicæ, quæ quo altius adscendit & latius se diffundit, eo majore cura fuit pertractanda. Hausit eam à summo & forte primo in Germaniæ Academijs post renata optima studia scientiæ hujus doctore CORNELIO MARTINO, & fertiles agros imitatus multo plura protulit quam acceperat. Optarim sanè in manibus studiosorum cum reliqua illius Philosophica, tum disputationes ejus Metaphysicas esse, in quibus de excelsa isthac disciplina solide & perspicue philosophatur. Eadem deinceps in  
D S. Theo-

**S.** Theologiæ arduis controversiis pertractandis vindicandisque tam scienter atque providè est usus, ut imperitorum malorumque invidiam, doctorum admirationem ac elogia sibi conciliaverit. Dixi de Philosophiâ, & præcipuis ejus partibus, & dixi eodem ordine, quo discendas illas esse Thomas Aquinas, doctor minimè vulgaris, studiosum lectorem jam olim commonuit. Cum itaque beatum CALIXTUM Latinæ, Græcæ, Hebraicæ linguæ peritum, insignem Poëtam, præstantem Historicum, eximium Oratorem & perfectum Philosophum fuisse adhuc ostenderim, neque esse possit, qui de his quæ optima fide simplici illa veritatis oratione retuli, queat dubitare, existimate jam porro, *Audisores*, quam egregiè ille implevit Hebræorum Magistri istud monitum: *Parate in vestibulo ut possis intrare conclave*. Etenim in Regiæ omnium disciplinarum, S. Theologiæ augustum illud conclave, in quod nonnulli temere interdum & parum in vestibulo parati, irrunt, ipse instructus egregiè & à Camœnis sororibus eo quem ostendi multiplici ornatu insignitus intravit, & inibi hunc cum humaniorum literarum, tum Philosophiæ cultum, ad diviniore scientiæ ornamenta atque præsidia magno S. Ecclesiæ & coelestis veritatis bono traduxit. Neutiquam improvidè, nedum profanè, sed eâ cautione, qua optimus maximus Deus etiam gentilem feminam bello captam in conjugium ab Israelita duci concedebat. Ut enim hujusmodi profanæ mulieris priusquam in thalamum sancti conjugis illa deduceretur, caput radi, ungues præcidi, & vestimenta mutari oportebat, ita CALIXTUS vir tam religiosus, quam eruditus, S. Hieronymi, quin ipsius D. Apostoli exemplo externam illam sive secula-

rem

27  
rem quam vocamus sapientiam, ob membrorum pulchritudinem, & eloquij venustatem, de captiva fecit Israëlitem, & quicquid in ea verè profanum ac Deo adversum protuberabat, nempe quod idololatriam, voluptatem, errorem, libidinem sapiebat, vel præcidere vel radere allaboravit, ut intemeratam & nativo suo decore nitentem Philosophiam ad S. Theologiæ felix ac foecundum connubium perduceret. Ita ergo auctus ornatusque dici non potest, quam per hæc præsidia, expedite, copiosè, sapienter tractaverit ardua illa S. Theologiæ studia, cujus omnium maximi ac præcipui ornamenta Calixtini justo elogio, cum eloquentia mea par non sit, faciam quod pictores solent, qui ingentem hominum turbam brevi tabula exhibitori multorum capitum solummodo vertices depingunt, ita ego huc delatus, tantum summa sequar fastigia rerum. In fidei itaque nostræ Christianæ capitibus omnibus ac singulis è vero suo principio validè ac perspicuè deducendis, in morum Christiano homine dignorum doctrinâ accuratè ad sanctorum legum normam & ad internam conscientiæ trutinam expendenda tradendaque, in divinarum scripturarum genuino sensu è fonte ipso eruendo, confirmandoque, in antiquæ, mediæ, recentis Ecclesiæ sententiis, decretis, ritibus, institutis, turbis, turbarumque causis, ac adhibitis remedijs exponendis, in controversiis quas vel prisca, vel talium, cheu ! nimium feracia, nostra seculæ excitarunt, dijudicandis, in his quæ sub certo anathematis periculo credi ac propugnari oportet, ab ijs in quibus & humanum nec exitiale est errare, secernendis, & ut summatim dicam in universo illo ac latè patenti sacram coelestiumque rerum campo prudenti consilio,

diserta oratione, eruditissimis scriptis, oraculi instar ressi-  
dere, & veluti regnare, hæc propria CALIXTI laus,  
hæc vera illius gloria est, de qua ex merito d. cere cum  
tempore excludar, satius nunc quidem esse censeo sum-  
mam hanc viri eruditionem facio quodam silentio vo-  
bis cum venerari. Ignoscite autem mihi quæso *Audito-  
res benevoli*, quod ego, cui brevitatis in dicendo semper  
adhuc placuit, præter morem diutius vos hic nunc deti-  
neam. Fecit id viri incomparabilis, mihi vobisque o-  
mnibus dulcis memoria per quam etiam vos rogo atque  
oro, ut postquam de excellenti doctrina ejus, dicentem  
patienter audivistis, jam ad pauca illa quæ de viri pietate  
strictim asseruntur, recolenda, vosmet excitare atque at-  
tentionem reficere velitis. Potest sane de venerabili  
CALIXTO verè dici quod de S. Ignatio aurei oris O-  
rator Christianus affirmavit, *Multiplicem coronam gratia  
spiritus contexit, qua sanctum illius caput redimivit.* Ego  
tamen de vitæ ejus sanctimonia eo nunc dicam brevius,  
quo illa Clm Collegæ, quarto ab exsequiis die habita ex  
hoc loco oratione est laudata disertius. Ergo ut Epico-  
rum Princeps, si quem Heroem carmine suo celebrare  
instituit, non vitæ cujusquam mimum omnem, sed cer-  
tum & eximium quoddam, ut itadicam, drama excerpere,  
& istius ad Ilium fortiter gesta, hujus in patriam erra-  
bundum reditum, illius in Italiam navigationem, alius  
memorabiliora decora quædam alia versibus suis canere  
solet, ita mihi hujus viri virtutum magnitudinem ora-  
tione minus assequi valenti, ad officium excusationemve  
satis erit, si de una caritate Christiana qua ille insigniter  
effulsit, pauca proferam, de illa inquam virtute quæ o-  
mnium Christianarum non tantum maxima sed & plera-  
rumque

rumque secunda mater, & ipsius quoque sanctæ fidei  
character est. Hoc cœlesti charismate perfusa mens,  
illius sinceri & candidi amoris studia atque officia nun-  
quam non in promptu habuit; Nemini adversus, erga  
omnes facilis, comis, benignus, tolerantissimus injuria-  
rum, opis suæ largus, collator, alienæ verè undus peti-  
tor, in dictis factisque quieti semper amans consilij.  
Hunc animum cum erga omnes gereret, in locò quoque  
ipsa re ostendere haut negligebat. Erga adolescentes  
eorumque errata lenis, æqualium nulli gravis, majorum  
superiorumque modestè reverens. Atque hoc Christi  
spiritu accenso amore erga universam per totum orbem  
sparsam Ecclesiam flagrabat, non tantum pro ejus con-  
servatione, & incremento vota precesque quotidie fun-  
dens, sed & cum primis pro pace illius & omnium fide-  
lium unionem, tam enixè tam omni animo ac cogitatione  
solicitus, ut ea causa, vigiliis, studiis, labores maximos  
exantlaverit, livoris, invidiæ, calumniæ virulenta tela plu-  
rima exceperit, quin imò vita ac sanguine suo, si qua fi-  
eri posset, pacem Christianis conciliare fuerit paratus.  
Quando unque itaque aliqua concordie sarcindæ spes,  
aut occasio, vel à Regibus ac Principibus, vel à pacificis  
ingenijs excitabatur, operam ille suam ore calamoque  
strenuè confert, inter adversarios clamores, Christi Do-  
mini mandato niti, reluctantibus comiter rectam osten-  
dere viam, desiderio autem suo, ob plurium pertinaciam  
defraudatus, dolere, gemere, lacrymari. Non habuit  
Servator majus amoris erga se, quod Petrum Apostolum  
posceret argumentum, quam si oves ille suas pasceret.  
Circumtulit beatus CALIXTUS oculus animumque  
per Domini gregem universum latè palantem, mutuis

30  
odijis ad ferrum & flammam usque distractum lavien-  
temque. Qui igitur erga Dominum Servatorem amo-  
rem suum testari certius potuit, quam cum ipsius Do-  
mini voce compescere hæc funesta dissidia & animos per  
Christi vulnera ad cælum adspirantes, ad mutuam a-  
morem reducere est enixus. Huic Christianæ charita-  
tis necessario studio quoad valuit, insudavit, huic cor-  
poris viribus defectus ad extremum usque spiritum in-  
gemuit. Quid præmij pro sancta opera à pervicacibus  
nonnullis tulerit, est in aprico. Sed bonum factum  
quod CALIXTUM cujus & summam eruditio-  
nem & pietatem singularem aliquo modo delineavi,  
boni omnes ac prudentes venerantur, Reges ac Princi-  
pes æstimant, & Deus optimus Maximus cujus servitio  
se totum consecraverat, & in hac vita dulci tranquillita-  
te animi pensavit, & in altera æterna illa ac beata im-  
mortalitate remuneratur.

Ceterum haut parum mihi gratulor, quod de tanti  
viri doctrina ac virtute publicè dicendi opportunitas  
mihi fuit oblata hoc tam celebri die, in quo omnium ma-  
ximè Vestra, *Illustres Legati, & Ordinum Provincialium  
delecti Proceres*, delector præsentia, prorsum persuasus,  
hujus tam amici vobis, dum vixit viri elogio, vestro pro  
Acad. salute his diebus labori exantlato, colophonem  
imponi & veluti acclamari, gratum vobis esse acceptum-  
que. Et quandoquidem divini Numinis Clementia,  
Vestris pro Lycei hujus conservatione susceptis nego-  
tistam benignè adspiravit, ut unanimi atque laudabili ve-  
stro connixu in publicum patriæ, Ecclesiæ atque reip.  
bonum omnia rite hodie sint peracta & ad exitum per-  
ducta, ego hæc voce publica optimo maximo Deo,  
omnium